

# **HOOFSTUK 4**

## **PERDE**



## 4. PERDE

- 4.1 Definisie van perde
- 4.2 Ouderdom van perde
- 4.3 Klassifikasie van perde
- 4.4 Paspoorte en registrasie van perde
- 4.5 Merk van perde
- 4.6 Toerusting van perde
- 4.7 Hoefbeslag
- 4.8 Gedrag van perde
- 4.9 Hingste en dragtige merries
- 4.10 Mishandeling van perde
- 4.11 Uitteken van perde
- 4.12 Dood van perde
- 4.13 Immunisasie van perde
- 4.14 Behandeling van perde
- 4.15 Beste voorbereide perd
- 4.16 Verbode middels

### 4.1 DEFINISIE VAN PERDE

- 4.1.1 Enige lid van die genus *Equus* en enige perderas mag aan uithouritte deelneem, mits die veeartspaneel van mening is dat die betrokke dier die afstand waarvoor ingeskryf is, sal kan voltooi. Verwysing na “perd” in hierdie reëlboek sal altyd alle ander lede van die genus *Equus* insluit.

### 4.2 OUDERDOM VAN PERDE

- 4.2.1 Die minimum ouderdom (op die dag van die betrokke rit) van perde vir deelname aan ritte wat onder UVvSA reëls aangebied word, is soos volg:
  - 4.2.1.1 Ritte van 30km: Vier (4) jaar.
  - 4.2.1.2 Ritte van 60 tot 99km: Vier-en-'n half (4½) jaar.
  - 4.2.1.3 Die Fauresmith 200 Nasionale Kampioenskappe: Vyf (5) jaar.
  - 4.2.1.4 Ritte van 100 kilometer of langer op een dag: Ses (6) jaar.
- 4.2.2 Indien enige twyfel bestaan oor die ouderdom van die perd kan van die ruiters vereis word om 'n geboortesertifikaat in te dien waarop die ouderdom van die perd aangedui word. Indien so 'n geboortesertifikaat nie tydens die ritbyeenkoms beskikbaar gestel kan word nie, sal die opinie van die hoofveearts van die betrokke rit (gegrond op 'n inspeksie van die perd se tande) geld.

### 4.3 KLASSIFIKASIE VAN PERDE

- 4.3.1 Nuwelingperde. Nuweling perde is alle perde wat nog nie die voorgeskrewe nuwelingfase voltooi het nie.

- 4.3.1.1 Nuwelingperde moet duidelik met 'n "N" op die boud (onder die ruiternommer) gemerk word, en die betrokke perd se veeartskaart moet ook met 'n "N" gemerk word.
- 4.3.1.2 Nuwelingperde mag inskryf vir ritte met 'n maksimum afstand van 90km (oor 'n minimum van drie bene) en mag nie vir ritte van langer as 90km inskryf nie.
- 4.3.1.3 Nuwelingperde moet na deelname aan 'n rit van langer as 40km (tot en met 90km) oor meer as een been minstens twintig (20) dae rus voordat hulle weer aan 'n rit (insluitende ritte van tot en met 40km oor een been) mag deelneem. Na ritte van tot en met 40km oor een been is daar geen rusperiode nie.
- 4.3.1.4 Indien 'n nuwelingperd ge-elimineer was, ongeag die afstand wat voltooi was voor eliminasië, moet die perd vir minstens twintig (20) dae rus voordat die perd weer aan 'n rit (insluitende ritte van tot en met 40km oor een been) mag deelneem.
- 4.3.1.5 Nuwelingperde MOET vir alle ritte van twee of meer bene inskryf volgens die trapleerstelsel (kyk Hoofstuk 2).
- 4.3.1.6 Nuwelingperde moet òf twee ritte van 60km EN twee ritte van 80km OF drie ritte van 80km voltooi alvorens hul as uithouritperde gereken word.
- 4.3.1.7 Wanneer 'n perd die nuwelingfase voltooi moet die volgende inskrywing op die "rekord van deelname" bladsy in die perd se paspoort, op die eerste lyntjie na die laaste nuwelingperdrif, gemaak en deur die Ritmeester van die betrokke rit onderteken word:
- "NOVICE HORSE PHASE COMPLETED"
- 4.3.1.8 Dit moet ook in die UvVSA perdedatabasis aangedui word dat die betrokke perd die nuwelingfase voltooi het.
- 4.3.2 Uithouritperde. Alle perde wat die nuwelingperdfase soos hierbo omskryf voltooi het, word geklassifiseer as uithouritperde.
- 4.3.3 Vereistes om aan langer ritte deel te neem.
- 4.3.3.1 Ten einde vir ritte van langer as 90km tot en met 139km op een dag, of ritte van 80km en langer oor twee agtereenvolgende dae in te skryf moet 'n perd as 'n uithouritperd geklassifiseer word.
- 4.3.3.2 Ten einde vir ritte van 140km tot en met 159km in te skryf moet 'n perd as 'n uithouritperd geklassifiseer word en reeds minstens een rit van 120 tot en met 139km, of twee ritte van 80km op twee agtereenvolgende dae suksesvol voltooi het.

4.3.3.3 Ten einde vir ritte van 160km en langer in te skryf moet 'n perd as 'n uithouritperd geklassifiseer word en reeds minstens een rit van 120km tot en met 139 km suksesvol voltooi het.

4.3.4 Die UVVSA gaan van die standpunt uit dat perde idealerwys geleidelik oor 'n tydperk van minstens drie (3) jaar voorberei moet word om mededingend aan uithouritte deel te neem.

#### **4.4 PASPOORTE EN REGISTRASIE VAN PERDE**

4.4.1 Om aan ritte wat oor twee of meer bene strek te mag deelneem, moet Suid Afrikaanse perde 'n SA Nasionale Perdesportfederasie of 'n erkende FEI paspoort hê. Paspoorte is nie nodig vir perde wat aan ritte wat oor een been strek deelneem nie. SA Nasionale Perdesportfederasiepaspoorte word uitgereik deur die UV v SA volgens die prosedure en teen kostes soos van tyd tot tyd deur die Raad bepaal.

4.4.2 Die paspoortkantoor hou 'n databasis (met al die besonderhede soos op die paspoortaansoekvorm) van alle perde wat by die UV v SA geregistreer is by en reik 'n UV nommer aan elk van hierdie perde uit. Om te verseker dat die databasis volledig bygehou kan word, mag paspoorte slegs uitgereik word indien alle relevante besonderhede op die vorm ingevul is. Die UV nommer word ook op die perd se paspoort aangebring. Suid Afrikaanse perde wat nie by die UV v SA geregistreer is (en wat dus nie 'n UV-nommer het nie), mag nie aan ritte wat oor meer as een been strek deelneem nie.

4.4.3 Indien 'n SA Nasionale Perdesportfederasiepaspoort by enige ander organisasie anders as die UV v SA aangekoop is (insluitend perde wat vantevore aan ander perdesport-dissiplines deelgeneem en dus reeds paspoorte het), moet die perd en paspoort steeds by die UVVSA geregistreer word. Dieselfde geld vir perde wat ingevoer is en wat 'n geldige paspoort (wat deur die FEI erken word) het. Sulke paspoorte moet aan die paspoortkantoor gestuur word, saam met 'n voltooide UV v SA paspoort-aansoekvorm (vir rekorddoeleindes) en bewys van betaling van die neergelegde fooi (soos van tyd tot tyd deur die Raad bepaal).

4.4.4 Onder geen omstandighede mag wysigings aan 'n paspoort aangebring word nie (deur bv. van korrigeervloeistof of soortgelyk gebruik te maak). Indien foute gemaak is wat reggestel moet word, moet aansoek gedoen word vir 'n duplikaatpaspoort.

4.4.5 Afskrifte van die rekord van eienaarskapbladsy (nadat dit voltooi is) en die bladsye met die beskrywing van die perd (nadat dit deur die veearts voltooi is) moet aan die paspoortkantoor gestuur word om die paspoort geldig te maak. Hierdie rekords word gebruik wanneer daar enige dispuut oor die identifikasie van 'n spesifieke perd bestaan.

4.4.6 Paspoorte moet met die "ERASA" stempel op die volgende bladsye gestempel wees:

4.4.6.1 "Rekord van Eienaarskap" bladsy

4.4.6.2 Beskrywing van die perd (middelblad).

4.4.7 Paspoorte moet ook op die bladsy met die beskrywing van die perd, langs die “ERASA” stempel, deur ‘n UV v SA beampete onderteken wees.

#### 4.4.8 Eienaarskap

4.4.8.1 Sodra die eienaar die paspoort vanaf die UV v SA ontvang het, moet die besonderhede op die betrokke bladsy (“Rekord van Eienaarskap”) aangeteken word.

4.4.8.2 Wanneer ‘n perd verkoop word, moet die verkoper die paspoort aan die nuwe eienaar oorhandig. Die nuwe eienaar moet die eienaarsinligting (“Rekord van Eienaarskap”) opdateer en die paspoort aan die paspoortkantoor terugstuur vir bekragtiging.

#### 4.4.9 Beskrywing van die perd

4.4.9.1 Die beskrywing van die perd in die paspoort (middelblad) moet deur ‘n veearts (verkieslik ‘n veearts wat gemoeid is met uithouritte) voltooi en onderteken word. Die perd moet teenwoordig wees wanneer die veearts hierdie beskrywing voltooi. Die riglyne soos neergelê in die handleiding rakende “Identification of Horses” (soos beskikbaar op die UVVSA webtuiste) moet gevolg word.

4.4.9.2 Lede wat paspoorte het waar die perd se beskrywing verkeerd gedoen is (soos aan die eienaar/ruiter deur ‘n veearts uitgewys), moet aansoek doen vir ‘n heruitreiking van ‘n paspoort en die foutiewe paspoort aan die paspoortkantoor terugbesorg.

4.4.9.3 In gevalle waar die identifikasie reggemaak kan word, kan dit gedoen word. Die veearts wat die regstellings doen, moet egter die bladsy stempel en teken. ‘n Afskrif van die opgedateerde bladsy moet dan aan die paspoortkantoor gestuur word.

4.4.9.4 Die beskrywing van die perd moet voltooi word voordat die perd aan ritte mag deelneem.

4.4.10 Rekord van Inenting. Perde moet ooreenkomstig die reëls van die UVVSA teen sekere siektes ge-immuniseer word. Die perd se inentingsgeskiedenis moet in die paspoort aangeteken wees (kyk Hoofstuk 8).

4.4.11 Wanneer ‘n perd doodgaan, moet die paspoortkantoor hiervan in kennis gestel word.

4.4.12 Verandering van die naam van ‘n perd. Indien ‘n nuwe eienaar die naam van sy/haar perd wil verander, geld die volgende:

4.4.12.1 Die paspoort moet aan die paspoortkantoor gestuur word.

4.4.12.2 Die paspoortkantoor sal die naamsverandering aanbring op die voorblad sowel as die identifikasiebladsy van die paspoort en dit sertifiseer deur daarby te teken en die UVVSA stempel by die

wysiging aan te bring. Die naamsverandering sal ook in die UVVSA perdedatabasis opgeteken word.

#### 4.4.13 Duplikaatpaspoorte

- 4.4.13.1 Indien 'n paspoort verlore gaan of sodanig beskadig raak dat dit nie langer gebruik kan word nie, moet die eienaar van die perd om 'n duplikaatpaspoort aansoek doen. Hierdie paspoort sal met dieselfde paspoort- en UV nommer as die oorspronklike uitgereik en duidelik as "Duplikaat" gemerk word.
- 4.4.13.2 Die rekord van immunisasie kan deur die veearts vanaf sy praktykrekords ingevul word. Indien sulke rekords nie beskikbaar is nie, word die perd hanteer asof dit nog nooit immuniseer was nie (en immunisasie moet van vooraf begin in ooreenstemming met die reëls, kyk Hoofstuk 8).
- 4.4.13.3 In alle gevalle waar duplikaatpaspoorte uitgereik word, moet die rekord van eienaarskapbladsy deur die eienaar voltooi word, en moet die beskrywing van die perd weer deur 'n veearts voltooi word. Afskrifte van hierdie bladsye moet dan aan die paspoortkantoor gestuur word.
- 4.4.13.4 Indien die oorspronklike paspoort gevind word, moet beide paspoorte aan die paspoortkantoor teruggestuur word. Die paspoortkantoor sal dan verseker dat die oorspronklike paspoort opdateer word, en die duplikaatpaspoort sal vernietig word.

#### 4.4.14 Wanneer die paspoort vol is (spesifiek die rekord van deelname bladsye) moet aansoek gedoen word vir 'n nuwe paspoort.

- 4.4.14.1 Hierdie paspoort sal uitgereik word met dieselfde paspoort- en "UV" nommer. Die ou paspoort moet saam met die nuwe aan 'n veearts voorgelê word. Die veearts moet seker maak dat die inentings op datum is en volgens die reëls gedoen is. In die nuwe paspoort moet die veearts dan die volgende inskrywing maak (let op dat inskrywings slegs in Engels gedoen mag word):

"Immunisation in previous passport up to date and in accordance with the rules. Last vaccinations were on (followed by the dates, the type of vaccine and the batch number of the last entry in the old passport)."

Onder hierdie inskrywing moet alle nuwe/opvolgende inentings dan aangeteken word.

- 4.4.14.2 Die ruiters moet altyd die ou paspoort byderhand hou.

#### 4.4.15 Vir internasionale deelname (buite Suider Afrika) moet perde oor 'n amptelike FEI paspoort beskik. Hierdie kan via die UV v SA kantoor vanaf die nasionale perdesportfederasie bekom word.

#### 4.4.16 Paspoortkontrole by ritte

- 4.4.16.1 Perdepaspoorte moet by elke rit deur die veeartspaneel nagegaan word om te verseker dat dit aan al die vereistes (rakende die beskrywing van die perd, paspoortadministrasie en immunisasie) voldoen.
- 4.4.16.2 Indien die beskrywing van die perd in die paspoort nie ooreenstem met die voorkoms van die perd wat vir ondersoek aangebied word nie, mag die perd nie toegelaat word om deel te neem nie. Dit moet ook so in die paspoort aangeteken word (op die bladsye "Identification of the horse described in this passport") en die hoofveearts van die rit moet by die inskrywing teken.
- 4.4.16.3 Indien die perd wel ge-identifiseer kan word, maar daar tog tekortkominge met die beskrywing is, moet dit skriftelik (deur 'n aantekening in die paspoort, op die bladsye "Identification of the horse described in this passport", waarby die hoofveearts van die rit moet teken) aan die ruiter oorgedra word. Die perd mag daarna nie weer aan 'n uithourit deelneem alvorens die tekortkominge nie reggemaak is nie.
- 4.4.16.4 Indien die perd se immunisasie nie in ooreenstemming met die reëls op datum is nie, mag die perd nie toegelaat word om deel te neem nie, en moet die perd van die terrein van die rit verwyder word. Die afwykings moet ook op die bladsy in die paspoort waarop die immunisasies aangeteken is, omskryf word en die hoofveearts moet daarby teken.
- 4.4.16.5 Ander administratiewe tekortkominge moet skriftelik (deur 'n aantekening in die paspoort op die bladsye "Identification of the horse described in this passport", waarby die hoofveearts van die rit moet teken) aan die ruiter oorgedra word. Die perd mag daarna nie weer aan 'n uithourit deelneem alvorens die tekortkominge nie reggemaak is nie.
- 4.4.16.6 By klub- en unieritte hoef geen aantekening in die paspoorte van perde wat aan al die vereistes voldoen, gemaak te word nie. By alle nasionale ritte moet elke perd se paspoort deur die hoofveearts van die betrokke rit afgeteken word (op die bladsye "Identification of the horse described in this passport"), waardeur daar dan gesertifiseer word dat die beskrywing van die perd in die paspoort ooreenstem met die perd wat aangebied was, en dat alle administratiewe aspekte en immunisasies aan die neergelegde vereistes voldoen het. Afwykings moet ook aangeteken word soos hierbo omskryf.

#### 4.5 MERK VAN PERDE

- 4.5.1 By alle ritte moet die ruiternommer duidelik aan weerskante op die boude van die perd aangebring word. Kyk ook die artikel oor nuwelingperde elders in hierdie hoofstuk.



## 4.6 TOERUSTING VAN PERDE

- 4.6.1 Saaltuiginspeksie. Dit is een van die pligte van die ritmeester om tydens 'n rit deurlopend inspeksie te hou van die saaltuig wat deur die ruiters gebruik word. Die ritmeester moet ruiters opdrag gee om enige saaltuig wat nie goed pas nie en/of die perd kan beseer te verwyder of te vervang.
- 4.6.2 Gebruik van beskermende uitrusting. Die hoofveearts by 'n rit kan, nadat 'n perd ondersoek is, toestemming verleen dat beskermende toerusting (soos aankapkussings, verbande en so meer) aan perde gebruik mag word. Die perd moet egter met beskermende toerusting in posisie aan die hoofveearts getoon word. Indien die hoofveearts die gebruik van die uitrusting goedkeur, moet dit so op die veeartskaart van die betrokke perd aangeteken word. Vir doeleindes van hierdie reël word hoofstewels nie as beskermende uitrusting gereken nie, en rus die onus op die ruiter of hy/sy die perd met of sonder hoofstewels wil ry.
- 4.6.3 Gebruik van bykomstighede. Die gebruik van toerusting en bykomstighede soos bv. groot saalsakke, as deel van die saaltuig word ontmoedig. Indien dit wel gebruik word, moet dit van 'n humanitêre aard wees. Enige teken dat hierdie bykomstighede tot die perd se ongerief lei, sal tot diskwalifikasie lei. Dit is die verantwoordelikheid van die ritmeester om hierdie aspek te monitor.
- 4.6.4 Die gebruik van toerusting wat die vrye beweging van die perd se kop belemmer word nie toegelaat nie.
- 4.6.5 Slegs gebitte wat deur erkende vervaardigers van perde-toerusting vervaardig is, en wat nie strydig is met diereregte en aanvaarde norme van dierewelsyn nie mag gebruik word. Geen tuisvervaardigde gebitte mag gebruik word nie.

## 4.7 HOEFBESLAG

- 4.7.1 Perde hoof nie beslaan te wees om aan uithouritte deel te neem nie, mits aan die voorwaardes soos omskryf hieronder voldoen kan word. Indien nie hieraan voldoen kan word nie, moet die perd aan al vier voete beslaan wees.
- 4.7.1.1 Indien die perd beslaan is moet die hoewe en skoene van so 'n toestand wees dat dit deur die veeartspaneel as geskik vir die spesifieke kompetisie beskou word. Indien so 'n perd 'n hoofyster tussen kontrolepunte verloor mag die ruiter aanhou ry tot by die eersvolgende kontrolepunt waar die hoofyster vervang moet word (die hoofyster kan ook, met toestemming van die Ritmeester, op die baan vervang word). Indien dit nie vervang word nie sal die ruiter nie toegelaat word om voort te gaan nie. Tyd wat so verlore gaan sal nie voor gekompenseer word nie. Die perd mag egter aan die einde van die rit sonder een of meer skoene aan die veeartspaneel aangebied word vir ondersoek (m.a.w. skoene wat verloor op die laaste been van die rit hoof nie vervang te word nie).
- 4.7.1.2 Perde mag sonder hoofysters deelneem

4.7.1.2.1 Indien slegs vir die eerste been van 'n rit ingeskryf word, en indien die hoofveearts wat by die betrokke rit diens doen, toestemming daartoe gee (hierdie besluit sal primêr gebaseer word op die oppervlakte van die baan waaroor gery gaan word, en die toestand van die perd se hoewe). Perde mag ook met toestemming van die betrokke hoofveearts vir die eerste been van 'n rit inskryf indien hulle slegs voor beslaan is.

OF

4.7.1.2.2 Indien die perd geregistreer is by die “Kaalvoet-groep”, en aan die vereistes soos deur hierdie groep neergelê voldoen. Sulke perde mag dan aan alle ritte wat onder die reëls van die UVVSA aangebied word (ongegag die afstand) deelneem. Rakende hierdie aspek:

- Moet die Kaalvoetgroep:
  - In elke Unie 'n koördineerder aanstel wat kaalvoetperde moet evalueer en toestemming moet gee voor 'n kaalvoetperd vir ritte oor twee bene mag inskryf, en voordat perde vir ritte oor drie of meer bene mag inskryf. Die koördineerder binne elke Unie moet die name van perde wat deur hom/haar gekeur is, na die Kaalvoetgroep se bestuur deurgee sodat hierdie perde in die kaalvoetdatabasis opgeneem kan word.
  - Toesien dat daar weekliks 'n opgedateerde lys van sulke perde op die UV v SA webtuiste beskikbaar gestel word.
  - Jaarliks 'n verslag oor deelname van "kaalvoet-perde" aan uithouritte onder die vaandel van die UV v SA aan die Raad voorlê.
- Moet die ritkomitee twee dae voor die rit die jongste lys van perde wat kaalvoet mag ry van die UV v SA webtuiste trek en dit by die ritbyeenkoms beskikbaar stel aan die ritmeester en hoofveearts.

4.7.1.3 Indien perde sonder hoefysters deelneem

4.7.1.3.1 Mag die perd op geen stadium gedurende die rit beslaan word nie.

4.7.1.3.2 Mag die perd wel met alternatiewe hoefbeskerming (insluitend maar nie beperk tot “Old Macs” en “Easy Boots”) toegerus word gedurende die rit.

## **4.8 GEDRAG VAN PERDE**

- 4.8.1 Dit is die uitsluitlike verantwoordelikheid van die ruiter van 'n perd wat geneig is om te skop te identifiseer deur 'n rooi lint aan die perd se stert te bind. Die lint moet duidelik sigbaar wees op 'n afstand van tien (10) meter. Die ruiter en sy helpers moet die perd verder so hanteer dat dit nie 'n gevaar vir ander ruiters en perde inhou nie. Ander ruiters, helpers en beamptes moet egter ook so optree dat hulle nie 'n skop veroorsaak nie. 'n Perd wat beslis 'n gevaar vir ander deelnemers en perde is, kan deur die ritmeester deelname ontsê of aan 'n rit onttrek word.
- 4.8.2 Ruiters wat volgens die oordeel van die ritmeester nie sy/haar perd behoorlik kan hanteer nie mag verplig word om te onttrek of uit te tree.

## **4.9 HINGSTE EN DRAGTIGE MERRIES**

- 4.9.1 Dit is die uitsluitlike verantwoordelikheid van die ruiter om hingste te identifiseer deur 'n geel lint aan die hings se stert te bind. Die lint moet duidelik sigbaar wees op 'n afstand van tien (10) meter. Die ruiter en sy helpers moet die hings verder so hanteer dat dit nie 'n gevaar vir ander ruiters en perde inhou nie. Ander ruiters, helpers en beamptes moet egter ook so optree dat hulle nie 'n gevaarlike situasie veroorsaak nie.
- 4.9.2 'n Hings wat beslis 'n gevaar vir ander deelnemers en perde is, kan deur die ritmeester deelname ontsê of aan 'n rit onttrek word.
- 4.9.3 Dragtige merries en merries met vullens wat nog nie gespeen is nie, mag nie aan uithouritte deelneem nie.

## **4.10 MISHANDELING VAN PERDE**

- 4.10.1 Enige optrede wat na die mening van die ritmeester as wreedheid teenoor of mishandeling van perde beskou kan word, sal tot diskwalifikasie lei. Die betrokke ruiter/helper/persoon sal verder aan die dissiplinêre komitee gerapporteer word, wat verdere dissiplinêre optrede kan oorweeg.

## **4.11 UITTEKEN VAN PERDE**

- 4.11.1 Alle perde moet, voordat hul van die terrein van 'n rit verwyder word, weer aan die veeartspaneel aangebied word vir 'n ondersoek. Hierdie word gedoen om te verseker dat die perd geskik is om vervoer te word.
- 4.11.2 Hierdie ondersoek word uitgevoer nadat daar 'n minimum van twee ure en 'n maksimum van drie ure verloop het sedert die perd die rit voltooi het of geëlimineer is, of sedert die ruiter uitgetree of gediskwalifiseer is, of die trapleer gestop het. Die hoofveearts van die betrokke rit kan, met inagneming van omstandighede, toestemming gee dat hiervan afgewyk word.
- 4.11.3 Die ruiter of verantwoordelike persoon moet die perd na die veeartsarea toe neem, en sy laaste tydkaartjie (as bewys van die tyd van voltooiing) aan die betrokke veearts oorhandig.

- 4.11.4 Die ritkomitee moet uittekenkaartjies aan die veeartspaneel beskikbaar stel wat vir hierdie doel gebruik moet word. Die veeartse sal die uittekenkaartjies by hulle hou en, nadat die perd ondersoek en geskik bevind is om die terrein te verlaat, die perd se besonderhede op die kaartjie invul, dit onderteken en aan die betrokke ruiter oorhandig.
- 4.11.5 Sou die veearts van mening wees dat die perd nie op daardie stadium geskik is om vervoer te word nie, moet die perd na die behandelingsveearts verwys word vir deeglike ondersoek en, indien nodig, behandeling.
- 4.11.6 Ruiterlogboeke en perdepaspoorte mag slegs na afloop van 'n rit aan die ruiter oorhandig word indien die ruiter 'n ingevulde en deur 'n lid van die veeartspaneel ondertekende, uittekenkaartjie inhandig.

## 4.12 DOOD VAN PERDE

- 4.12.1 Indien 'n perd gedurende 'n ritbyeenkoms doodgaan of van kant gemaak word moet die ritkomitee toesien dat die volgende dokumentasie by die UVVSA sentrale kantoor ingedien word:
- 4.12.1.1 Die voorgeskrewe UVVSA Vorm (Dood van Perd).
- 4.12.1.2 Die veeartskarta van die betrokke perd.
- 4.12.1.3 'n Volledige skriftelike verslag deur die voorsitter van die klub of die voorsitter van die ritkomitee (t.o.v. klub- en unieritte), of die koördineerder van die nasionale kampioenskap (t.o.v. nasionale kampioenskappe) oor die aangeleentheid.
- 4.12.1.4 'n Volledige skriftelike verslag deur die hoofveearts wat by die betrokke rit diens gedoen het. Hierdie verslag moet inligting rakende die weersomstandighede, rytoestande, detail rakende die ondersoek van die perd by alle kontrolepunte en enige ander toepaslike inligting bevat. Indien moontlik moet die bevindinge van die nadoodse ondersoek ook ingesluit word (indien dit eers later beskikbaar word, moet dit dan aan die UVVSA sentrale kantoor versend word).
- 4.12.1.5 'n Volledige skriftelike verslag deur die ruiter oor sy/haar indrukke van die voorval. Hierdie verslag moet agtergrondinligting rakende die spesifieke perd, die ruiter se indrukke oor wat gebeur het, die ruiter se reaksies op enige afwykende gedrag van die perd of inligting wat hy vanaf die veeartse by die kontrolepunte gekry het, en ook hoe hy/sy die veeartsoptrede ervaar het, insluit.
- 4.12.2 Die administratiewe beampte moet afskrifte van hierdie verslae na die Raadsveearts versend. Die Raadsveearts moet elke geval beoordeel en besluit oor verdere optrede. Indien hy/sy van mening is dat verdere optrede geregverdig is moet die aangeleentheid na die Dissiplinêre Komitee van die Raad verwys word.

**4.13 IMMUNISASIE VAN PERDE**

Kyk veteriniêre reëls (hoofstuk 8)

**4.14 BEHANDELING VAN PERDE**

Kyk veteriniêre reëls (hoofstuk 8)

**4.15 BESTE VOORBEREIDE PERD**

Kyk veteriniêre reëls (hoofstuk 8).

**4.16 VERBODE MIDDELS**

Kyk veteriniêre reëls (hoofstuk 8)